

In avemaria per l'alp

Premiera da film a Glion



En la Svizra rumantscha è l'usit da l'avemaria per l'alp cunzunt anc derasà en la Surselva catolica. Ma l'usit è sin murir or.

MAD

■ (cp) RTR Radiotelevision Svizra Rumantscha envida a la premiera dal film «In avemaria per l'alp», in film da Bruno Moll. Quai mardi, ils 24 d'avrigl 2012, a las 20:00 en il Cinema sil plaz, Glion. Stad, ad alp, i fa notg. Tras in dratguir per latg cloman ils signuns «l'avemaria». Mintga di, da mintg'aura. Els rogan Dieu ed ils sontgs da preservar l'alp da disgrazias. Ed els rogan dad aut, perquai che la protecziun vala uschè lunsch, ch'ins auda lur vusch. La benedicziun da l'alp vala sco la pli veglia furma da la musica populara ch'è anc adina viva. Ella na vegn betg chantada per plaschair dals turists, ma bain ord profunda persvasiun interna. Il pli fitg viva il ritual anc en la Svizra Centrala ed en l'Alpstein en la Svizra Orien-

tala. En la Svizra rumantscha è l'usit cunzunt anc derasà en la Surselva catolica. Ma l'usit è sin murir or.

Il film purtretescha Placi Giusep Pelican da Surrein, Pauli Bass da Sumvitg e Patric Albrecht da Danis. La Surselva è il lieu, nua ch'els vivan. Els trais pratitgeschan «l'avemaria» en differentas modas: per part sco pasters activs, per part sco reminiscenza da temps passads. Sco quart è il scrivent sursilvan Leo Tuor da la partida. Il film mussa la vita da mintgadi dals protagonistis e focusescha cunzunt lur relaziun vers la natira e lur identitad religiusa en in mund modern. Il film dat in'egliada intensiva e plain fassetas en in «auter mund», nua che uman ed animal, natira e civilisaziun s'entaupan. Bruno Moll, il

reschissur undrà pliras giadas, è vegnì enconuschent cun films sco «A pe a Santiago de Compostela» u «Pizza Betlehem». Suenter «Quels da Lü» è «In avemaria per l'alp» sia pli nova contribuziun per l'emissiun «Cuntrasts» da la Television Rumantscha (TR). L'occurrenza è publica, l'entrada gratuita.

Il film «In avemaria per l'alp» da l'emissiun «Cuntrasts» vegn mussà en ils programs da la SRG SSR sco suonda:
dumengia, ils 29-04-12, 17:25 sin SF1 repetiziuns
mesemna, ils 02-05-12, a las 08:30, 09:30, 10:30, 12:50 sin SF info
gievgia, ils 03-05-2012, a las 10:55 sin SF info
sonda, ils 05-05-12, a las 17:10 sin SF 1
dumengia, ils 06-05-12, a las 07:00 sin TSR 1
ubain a las 07:30 sin RSI LA1